

Visoki predstavnik informirao zvaničnike SAD-a o izazovima i mogućnostima u BiH

Nakon obraćanja Vijeću sigurnosti UN-a u New Yorku u utorak i sastanka sa generalnim sekretarom UN-a Ban Ki-moonom, visoki predstavnik Valentin Inzko danas i sutra u Washingtonu će održati razgovore sa višim zvaničnicima američke vlade, uključujući zamjenika državnog sekretara Williama Burnsa.

Tokom ovih sastanaka, visoki predstavnik će ponoviti poruku koju je uputio Vijeću sigurnosti. Politički establišment BiH ne uspijeva ostvariti osnovne uvjete upravljanja zemljom i evroatlantskih integracija. Kao rezultat, Bosna i Hercegovina zaostaje za ostatkom regije.

Međutim, visoki predstavnik smatra da se ova neprihvatljiva situacija može promijeniti i reći će im da međunarodna zajednica mora zadržati svoje kapacitete i spremnost da radi sa stranama u BiH koje žele da zauzmu konstruktivniji pristup.

Uzimajući u obzir zastoje i dominantnu politiku podjele s kojom se Bosna i Hercegovina suočava, izvršni mandati međunarodnih institucija i dalje imaju ključni značaj za zaštitu interesa i sigurnosti građana Bosne i Hercegovine. „U Bosni i Hercegovini je dosta postignuto od potpisivanja Dejtonskog mirovnog sporazuma, ali još uvijek nismo vidjeli znake da zemlja nezaustavljivo napreduje k Evropskoj uniji i NATO-u, koji bi nam omogućili da zaključimo kako je naš posao završen“, rekao je visoki predstavnik.

U New Yorku i Washingtonu visoki predstavnik održava dugi niz sastanaka s ambasadorima ključnih zemalja partnera Bosne i Hercegovine, kao i s visokopozicioniranim zvaničnicima čije nadležnosti pri State Departmentu, Vijeću nacionalne

sigurnosti i Uredu potpredsjednika SAD-a, obuhvataju Bosnu i Hercegovinu i Zapadni Balkan.